

集部輯佚文獻彙編

翟金明 主編



國家圖書館出版社

69

集部輯佚文獻彙編

69

劉盼遂 輯出

中國書畫出版社

(南朝梁)任昉撰

任彦升集五卷
(卷三—五)

清宣統三年(1911)上海文明書局鉛印《漢魏六朝名家集初刻》本

第六十九冊目錄

別集(六十九)

南朝梁(三)

任彦升集五卷(卷三—五) (南朝梁)任昉撰

卷三 一

卷四 一七

卷五 三一

任昉 (南朝梁)任昉撰 丁福保輯 四〇

丘遲 (南朝梁)丘遲撰 (明)馮惟訥輯 四七

丘遲 (南朝梁)丘遲撰 (清)嚴可均輯 五五

丘遲 (南朝梁)丘遲撰 丁福保輯 六五

劉苞 (南朝梁)劉苞撰 (明)馮惟訥輯 六九

劉苞 (南朝梁)劉苞撰 丁福保輯 七一

虞囑	(南朝梁)虞囑撰	(清)嚴可均輯	七三
梁沈約集一卷	(南朝梁)沈約撰		七五
沈約	(南朝梁)沈約撰	(明)馮惟訥輯	一六一
沈休文集五卷	(南朝梁)沈約撰		
序			二六一
傳			二七三
目錄			二八九
卷一			三一九
卷二			三八九
卷三			四五七
卷四			五四一
卷五			六一五

任彥昇集卷三

梁 樂安任昉著

奏請郊廟備六代樂

據魏王肅議周禮賓客皆作備樂。况天地宗廟事之大者。周官以下。六律六呂五聲八音六舞大合樂。致鬼神以和邦國。請依王肅祀祭郊廟。備六代樂。通典一百四十七太常任昉奏

奏彈曹景宗

御史中丞臣任昉稽首言。臣聞將軍死綏。咫尺無卻。顧望避敵。逗撓有刑。至乃趙母深識。乞不爲坐。魏主著令。抵罪已輕。是知敗軍之將。身死家戮。爰自古昔。明罰斯在。臣昉頓首頓首。死罪死罪。竊尋獯獫侵軼。暫擾疆陲。王師薄伐。所向風靡。是以淮徐獻捷。河兗凱歸。東關無一戰之勞。塗中罕千金之費。而司部懸隔。斜臨寇境。故使狡虜憑陵。淹移歲月。故司州刺史蔡道恭。率厲義勇。奮不顧命。全城守死。自冬徂秋。猶有轉戰無窮。亟摧醜虜。方之居延。則陵降而恭守。比之疏勒。則耿存而蔡亡。若使郢部敵兵。微接聲援。則單于之首。久懸北闕。豈直受降可樂。涉安啓

士而已哉。實由郢州刺史臣景宗受命致討。不時言邁。故使蜩結蟻聚。水草有依。方復按甲盤桓。緩救資敵。遂令孤城窮守。力屈凶威。雖然。猶應固守三關。更謀進取。而退師延頸。自貽虧衄。疆場侵駭。職是之由。不有嚴刑。誅賞安實。景宗卽主臣。謹案使持節都督郢司二州諸軍事。左將軍郢州刺史。湘西縣開國侯臣景宗。擢自行閒。遭茲多幸。指蹤非擬。獲獸何勤。賞茂通侯。榮高列將。負擔裁弛。鐘鼎遽列。和戎莫效。二八已陳。自頂至踵。功歸造化。潤草塗原。豈獲自己。且道恭云逝。城守累旬。景宗之存。一朝棄甲。生曹死蔡。優劣若是。惟此人斯。有覲面目。昔漢光命將。坐知千里。魏武置法。案以從事。故能出必以律。錙銖無爽。伏惟聖武英挺。略不出世。料敵制變。萬里無差。奉而行之。實弘廟算。惟此庸固。理絕言提。自逆胡縱逸。久患諸夏。聖朝乃顧。將一車書。愍彼司氓。致辱非所。早朝永歎。載懷矜惻。致茲虧喪。何所逃罪。宜正刑書。肅明典憲。臣謹以効。請以見事。免景宗所居官。下太常。削爵土。收付廷尉法獄治罪。其軍佐職僚。偏裨將帥。結諸應及咎者。別攝治書侍御史。隨違續奏。臣謹奉白簡以聞云云。

選文

奏彈劉整

御史中丞臣任昉稽首言。臣聞馬援奉嫂不冠不入汜。毓字孤家無常子。是以義士節夫聞之有立。千載美談。斯爲稱首。臣昉頓首頓首。死罪死罪。謹案齊故西陽內史劉寅妻范。詣臺訴列。稱出適劉氏二十許年。劉氏喪亡。撫養孤弱。叔郎整常欲傷害侵奪。分前奴教子當伯。並已入衆。又以錢婢姊妹弟溫。仍留奴自使。伯又奪寅息逡婢綠草。私貨得錢。並不分逡。寅第二庶息師利。去歲十月。往整田上。經十二日。整便責范米六斗哺食。米未展送。忽至戶前。隔箔攘拳大罵。突進房中。屏風上取車帷準米去。二月九日夜。婢采音偷車欄夾杖龍牽。范問失物之意。整便打息逡。整及母并奴婢等六人。來至范屋中。高聲大罵。婢采音舉手查范臂。求攝檢如訴狀。輒攝整亡父舊使奴海蛤到臺辯問。列稱整亡父興道。先爲零陵郡。得奴婢四人。分財以奴教子。乞大息寅。寅亡後。第二弟整仍奪教子云應入衆。整便留自使。婢姊及弟各准錢五千文。不分逡。其奴當伯。先是衆奴整兄弟未分財之前。整兄寅以當伯貼錢七千。共衆作田。寅罷西陽郡還。雖未別火食。寅以私錢七千贖當伯。仍使上廣州。去後。寅喪亡。整兄弟後分奴婢。唯餘婢綠草入衆。整復云。寅未分財。贖當伯。又應屬衆。整意貪得當伯。推綠草與逡。整規當伯還。擬欲自取。

當伯遂經七年不返。整疑已死亡不迴。更奪取婢綠草。貨得錢七千。整兄弟及姊共分此錢。又不分遂。寅妻范云。當伯是亡夫私贖。應屬息遂。當伯天監二年六月。從廣州還至。整復奪取。云應充衆准雇。借上廣州四年夫直。今在整處。使進責整婢采音。劉整兄寅第二息師利。去年十月十二日。忽往整墅停住。十二日。整就兄妻范求米六斗哺食。范未得還。整怒。仍自進范所。往屏風上取車帷爲質。范送米六斗。整卽納受。范今年二月九日夜。失車欄子夾杖龍牽等。范及息遂道是采音所偷。整聞聲。仍打遂。范喚問何意打我兒。整母子爾時便同出中庭。隔箔與范相罵。婢采音及奴教子楚玉法志等四人。於時在整母子左右。整語采音其道汝偷車校具。汝何不進裏罵之。旣進爭口。舉手誤查范臂。車欄夾杖龍牽。實非采音偷。進責寅妻范奴苟奴。列稱孀去二月九日夜。失車欄夾杖龍牽。疑是整婢采音所偷。苟奴與郎遂往津陽門糴米。遇見采音在津陽門。賣車欄龍牽。苟奴登時欲捉取。遂語苟奴。已爾不須復取。苟奴隱避。少時。伺視人買龍牽。售五千錢。苟奴仍隨遂歸宅。不見片錢。並如采音苟奴等列狀。粗與范訴相應。重覈當伯教子列孀被奪。今在整處。使悉與海蛤列不異。以事訴法令史潘僧尙議。整若輒略兄子遂。

分前婢貨賣及奴教子等私使。若無官令。輒收付近獄測治。諸所連逮。絀應洗之源。委之獄官。悉以法制從事。如法所稱。整卽主臣。謹案新除中軍參軍臣劉整。閭閻茸名。教所絕。直以前代外戚。仕因紈袴。惡積釁稔。親舊側目。理絕通問。而妄肆醜辭。終夕不寐。而謬加大杖。薛包分財。取其老弱。高鳳自穢。爭訟寡嫂。未見孟嘗之深心。唯數文通之僞迹。昔人睦親。衣無常主。整之撫姪。食有故人。何其不能折契鍾庾。而襜帷交質。人之無情。一何至此。實教義所不容。紳冕所共棄。臣等參議。請以見事免整。所除官。輒勒外收。付廷尉法獄治罪。諸所連逮。應洗之源。委之獄官。悉以法制從事。婢采音不款。偷車欄龍牽。請付獄測實。其宗長及地界職司。初無糾舉。及諸連逮。請不足申盡。臣昉云云。誠惶誠恐。以聞。文選

奏彈蕭穎達

臣聞貧觀所取。窮視不爲。在於布衣窮居。介然之行。尙可以激貪厲俗。惇此薄夫。況乎伐冰之家。爭雞豚之利。衣繡之士。受賈人之服。風聞征虜將軍臣蕭穎達。敗乞魚軍稅。輒攝穎達宅督彭難當。到臺辨問。列稱尋生魚典稅。先本是鄧僧琰。敗乞限訖。今年五月十四日。主人穎達。於時謂非新立。仍敗乞。接代僧琰。卽蒙降許。

登稅與史法論。一年收直五十萬。知其列狀。則與風聞符同。穎達卽主臣。謹案征虜將軍太子左衛率。作唐縣開國侯。臣穎達備位大臣。預聞執憲。私謁亟陳。至公寂寞。屠中之志。異乎鮑肆之求。魚殮之資。不俟潛有之數。遂復申茲文二。追彼十一。風體若茲。準繩斯在。陛下弘惜勳良。每爲曲法。臣當官執憲。敢不直繩。臣等參議。請以見事免穎達所居官。以候還第。

梁書蕭穎達傳

奏彈范縝

臣聞息夫歷詆。漢有正刑。白襃一奏。晉以明罰。況乎附下訕上。毀譽自口者哉。風聞尙書左丞臣范縝。自晉安還。語人云。我不詣餘人。惟詣王亮。不餉餘人。惟餉王亮。輒收縝白。從左右萬休到臺辨問。與風聞符同。又今月十日。御餞梁州刺史臣珍國。宴私既洽。羣臣並已謁退。時詔留侍中臣昂等十人。訪以政道。縝不答所問。而橫議沸騰。遂貶裁司徒臣朏。褒舉庶人王亮。臣於時預奉恩留。肩隨並立。耳目所接。差非風聞。竊尋王有遊豫。親御軒陛。義深推轂。情均湛露。酒闌宴罷。當展正立。記事在前。記言在後。軫早朝之念。深求瘼之情。而縝言不遜。妄陳褒貶。傷濟濟之風。缺側席之望。不有嚴裁。憲準將頽。縝卽主臣。謹案尙書左丞臣范縝。衣冠緒

餘言行舛駁。誇諸里落。喧詬周行。曲學謾聞。未知去代。弄口鳴舌。祇足飾非。乃者義師近次。縝丁懼艱棘。曾不呼門。墨綬景附。頗同先覺。實奉龍顏。而今黨協。餘繇爲矛楯。人而無恒。成茲姦誑。日者飲至策勳。功微賞厚。出守名邦。入司管轄。苞篋罔遺。而假稱折轅。衣裾所弊。譏激失所。許與疵廢。廷辱民宗。自居樞憲。糾奏寂寞。顧望縱容。無至公之議。惡直醜正。有私訐之談。宜置之微纒。肅正國典。臣等參議。請以見事。免縝所居官。輒勒外收付廷尉法獄治罪。應諸連逮。委之獄官。以法制從事。縝位應黃紙。臣輒奉白簡。梁書王亮傳

朝堂諱榜議

抵取證明之文。憫之卽情。惟允直。班諱之典。爰自漢世。降及有晉。歷代無爽。今之諱榜。兼明義訓。邦之字國。實爲前事之徵。名諱之重。情敬斯極。故懸諸朝堂。縉紳所聚。將使起伏晨昏。不違耳目。禁避之道。昭然易從此。乃敬恭之深旨。何情典之或廢。尊稱霍氏理例乖方。居下以名。故以不名爲重。在上必諱。故以班諱爲尊。因心則理無不安。卽事則習行已久。謂宜式遵。無所創革。南齊書王慈傳永明中儀曹郎任昉議

齊明帝諡議

窮神之跡。無繼於成名。教思所宗。言歸於有稱。是以則天爲大。義盡於翼善。武功受命。理貫於斯文。伏惟功高五讓。道冠三極。愛敬始於揚名。孝饗終乎嚴配。寥廓大度。誕君人之符。閨庭小節。應軌物之訓。歷試允諧。納揆時序。貽厥之寄。義均負圖。棖棟惟新。壓焉將及。於是承制宣德。定策公卿。登嗣后於西鍾。反獨夫於侯服。既而主幼時艱。仍離屯蹇。應當璧之祥。注息肩之願。立德以長。紹開中興。擬度天行。取則乾健。日昃罷朝。幽枉必達。官曹寂寞。園狎空虛。虎門肆義。大足協律。巖廊有縉紳之談。鄉塾無橫議之士。既富而教。弘此孝治。遂使家無蕩子。野有栖畝。實天下於掌握。覽八荒於戶牖。寵徵金穴之家。恩絕椒風之館。天應民和。祥符總暨。故能上變雲物。下漏深泉。若乃青丘丹陵之國。黃銀紫玉之瑞。幽符遠萃。詢德報功。方將馳道日觀。清宮鳴澤。爲而不恃。高揖成功。百川所以朝宗。參辰於焉取正。豈所謂中衢均奠。懸衡共軌者歟。

藝文類聚十四

到大司馬記室牋

記室參軍事任昉。死罪死罪。伏承以今月令辰。肅膺典策。德顯功高。光副四海。含生之倫。庇身有地。况昉受教君子。將二十年。咳唾爲恩。眄睐成飾。小人懷惠。顧知

死所。昔承嘉宴。屬有緒言。提挈之旨。形乎善謔。豈謂多幸。斯言不渝。雖情謬先覺。而迹淪驕餌。湯沐具而非弔。大廈構而相賀。明公道冠二儀。勳超遂古。將使伊周奉轡。桓文扶轂。神功無紀。作物何稱。府朝初建。俊賢翹首。惟此魚目。唐突璵璠。顧已循涯。實知塵忝。千載一逢。再造難答。雖則殞越。且知非報。不勝荷戴屏營之謹詣。廳奉白牋。謝聞。防死罪死罪。文選梁書任昉傳

爲府僚勸進梁公牋

伏承嘉命。顯至佇策。明公逡巡盛禮。斯實謙尊之旨。未窮遠大之致。何者。嗣君棄常。自絕宗社。國命民生。翦爲仇讐。折棟崩榱。壓焉自及。卿士懷脯斲之痛。黔首懼比屋之誅。明公亮格天之功。拯水火之切。再躋日月。重綴參辰。反龜玉於塗泥。濟斯民於阡岸。使夫匹婦童叟。羞言伊呂。鄉校里塾。恥談五霸。而位卑乎阿衡。地狹於曲阜。慶賞之道。尙其未洽。夫大寶公器。非要非距。至公至平。當任誰讓。明公宜祇奉天人。允膺大禮。無使後予之歌。同彼胥怨。兼濟之仁。翻爲獨善。梁書武帝紀類聚十四以爲任昉作

又牋

近以朝命蘊隆。冒奏丹誠。奉被還命。梁書南史藝文類聚作令未蒙虛受。縉紳顙顙。深所未達。

蓋聞受金於府。通人之弘致。高蹈海隅。匹夫之小節。是以履乘石而周公不以爲

疑。增玉璜而太公不以爲讓。況世哲繼軌。先德在民。經綸草昧。歎深微管。加以朱

方之役。荆河是依。班師振旅。大造王室。雖復累繭救宋。重眡存楚。居今觀古。曾何

足云。而惑甚盜鐘。功疑不賞。皇天后土。不勝其酷。是以玉馬駿犇。表微子之去。金

販出地。告龍逢之怨。梁書南史作冤明公據鞍輟哭。厲三軍之志。獨居掩涕。激義士之心。

故能使海若登祗。罄圖效祉。山戎孤竹。束馬景從。伐罪弔民。一匡靖亂。匪叨天功。

實勤濡足。且明公本自諸生。取樂名教。道風素論。坐鎮雅俗。不習孫吳。遣茲神武。

驅盡誅之氓。濟必封之俗。龜玉不毀。誰之功歟。獨爲君子。將使伊周何地。某等不

達通變。實有愚誠。不任慙款。藝文類聚作棘心重謁。伏願時。藝文類聚作特膺典冊。式副民望。

文選梁書武帝紀上南史六藝文類聚十四

爲王金紫謝齊武帝示皇太子律序啟

臣聞化澄上業。草纓垂典。教清中世。艾服懲刑。自禮失宗周。俗反炎漢。張馮導其迹。賈杜浚其流。仲舒之得情。孔子之博約。故以義該往哲。盡美前王。而年世浸遠。

篇牘訛誤。朽編落簡。見誣前淑。悔文擅議。取弊後昆。立不倚衡。遂均鴻毛之殞。傷足居憂。忘貽髮膚之痛。豈所以臨河永歎。含育最靈者也。伏惟陛下。施博天地。澤深禹湯。溫舒之策。優游虛授。衛展之議。寧失弗經。削秋荼之法。解凝脂之網。藝文類聚

奉答敕示七夕詩啟

臣防啟。奉敕并賜示七夕五韻。竊惟帝迹多緒。俯同不一。託情風什。希世罕工。雖漢在四世。魏稱三祖。寧足以繼想南風。克諧調露。性與天道。事絕稱言。豈其多幸。親逢旦暮。臣早奉龍潛。與買馬而入室。晚屬天飛。比嚴徐而待詔。惟君知臣。見於訥言之旨。取求不疵。表於辯才之戲。謹輒率庸陋。式訓天獎。拙速雖效。蚩鄙已彰。臨啟慚慙。罔識所實。謹啟。文選

爲卞彬謝脩卞忠貞墓啓

臣彬啓。伏見詔書。并鄭義泰宣敕。當賜脩理。臣亡高祖晉故驃騎大將軍建興忠貞公童墳塋。臣門緒不昌。天道所昧。忠遺身危。孝積家禍。名教同悲。隱淪惆悵。而年世貿遷。孤裔淪塞。遂使碑表蕪滅。丘樹荒毀。狐兔成穴。童牧哀歌。感慨自哀。日

月纏迫。陛下弘宣教義。非求效於方今。盡餘烈不泯。固陳力於異世。但加等之渥。近闕於晉典。樵蘇之刑。遠流於皇代。臣亦何人。敢謝斯幸。不任悲荷之至。謹奉啟事以聞。謹啟。選文

啟蕭太傅固辭奪禮

防啟。近啓歸訴。庶諒窮歎。奉被還旨。未垂哀察。悼心失圖。泣血待旦。君於品庶。示均鎔造。干祿祈榮。更爲自拔。虧教廢禮。豈關視聽。所不忍言。具陳茲啓。防往從末。宜祿不代耕。飢寒無甘旨之資。限役廢晨昏之半。膝下之懽。已同過隙。几筵之慕。幾何可憑。月冥酌不親。如在安寄。晨暮寂寥。閔若無主。所守既無別理。窮咽豈及多喻。明公功格區宇。感通有塗。若霽然降靈。賜寢嚴命。是知孝治所被。爰至無心。錫類所及。匪徒教義。不任崩迫之情。謹奉啟事陳聞。謹啟。選文

求爲劉瓛立館啟

昔在魏中。爰及晉始。書貴虛玄。人悅陶縱。瑚璉廢泗上之容。樽俎恣林下之適。春秋羽委曠而弗陳。西序東膠。寂寥而誰仰。所以金雞忘曉。玉羊失馭。神器毀於獯戎。寶厓遷於干越。豈不悲歎。劉瓛澡身浴德。修行明經。賤珪璧於光陰。竟松筠